

國朝耆獻類徵初編卷百四十一目錄

郎署三

裴裘

李模

曹玉珂

邱元武

曹貞吉

朱玉

蘇金鉉

侯元棐

楊蘊

張燕翼

楊兆傑

王復衡

郭居鼎

張宸

蔡騶

曹首望

卜陳彝

秦敬傳

錢芳標

任辰旦

汪懋麟

陳玉璫

陳宗石

補錄

陶之典

劉迪

國朝耆獻類徵初編卷百四十一

通奉大夫前署江西巡撫江西布政使司布政使湘陰李桓輯

郎署三

裴裘

吾邑自孟雲浦先明德後蓋多君子云其窮而在下者得二人焉
曰邱方山裴華池方山以文無害爲掾吏清節聞於後世而華池
亦終於文學其爲人多忠孝大節嘗率眾保聚拒賊仁而有勇者
也又得吾嗣蘆院先生顯揚其遺緒學者得以稱述之不倦予少
時嘗誌華池之墓於今二十有五年而蘆院卒於里門易簀時謂
其子虹曰吾生平學不求名汝曹若不沒吾行事則莫若同邑呂

子之知我深也其訃而屬銘焉嗚呼先生往矣其嘉言嫩行益不
勝書書其大者以嘉惠來學俟諸史氏是後死者之責也敢不承
命先生諱表字九章居蘆院里因以爲號系出唐晉國公度後明
初諱成者爲先生始祖自聞喜遷河南之新安世有涓德六傳至
高祖洲以德行賜儒官曾祖光前諸生祖椿以孝友稱父翰芳字
華池以諸生 贈奉直大夫兵部員外郎祀於鄉娶高氏生先生
繼黃氏生褒先生自兒時動中儀則事父母定省不踰時出入必
告侍大母疾無間蚤夜及長與弟褒友愛彌篤先生旣遊庠序隨
父館澠池得悉讀曹月川集乃嘆曰一代真儒也弗是之學亦虛
生耳明末避難山中躬汲爨以奉親愉婉承順猶日三復月川諸

書心私淑之 國朝丁酉舉於鄉己亥成進士自是學日進然簡

穆寡營人或易之初不謂先生能官也初授粵西貴縣知縣時逆
藩倡亂道塞或沮其行先生曰甫爲人臣而卽以趨避爲自全計
謂所學何卒往抵粵東肇慶從總制議軍儲以圖恢復會粵西盡
陷乃之吉安道中數遇賊祕其符以智得脫開府佟公雅重其節
槩代咨部得改授江南溧陽溧陽稱劇邑難治豪黨繁有徒令至
卽陷以利因挾其短長不則市逋逃姦盜以中之鮮有解免者或
爲先生難之先生曰昔人以盤錯別利器事無難顧力行何如耳
旣至吏果以千金進先生誓而卻之將置諸法吏泥首謝乃已因
摘發邑中豪猾及漕弁之數爲奸利者翦其魁百姓安堵歲旱勸

富室出粟或躬詣其家爲陳說利害人無不立應者復泣請於兩
臺奏免額稅前後三萬餘金設糜全活者以億計其他善政率類
此政咸被 召命以丁太宜人艱歸讀禮時益潛心孝經日取先
明德所著義疏尋繹之欲集爲成書未就服闋授兵部督捕主事
在官逋逃無株連者督儲通州卻餽遺漕運如期庚午貳江南典
試得人爲盛晉武選司員外郎尋以足疾假歸在籍十餘年乃終
時康熙四十三年九月十七日也距生於天啟壬戌得壽八十有
三配韓宜人邑善人韓惟新女子男四缸峽嶸峻女一娶嫁俱詳
狀中孫七紹祖縉祖緒祖繹祖繩祖纘祖統祖曾孫七人凡三世
彬彬文學稱其家兒也先生之學自慎獨而力行仁孝根心順達

而不窮既私淑曹正夫月川尋其墜緒復矩步於孟雲浦先明德之芳躅以儉居德以禮善俗喪致哀祭致誠履信撝謙恂恂若不能言然賦性剛介有一介不取之操以故有志必爲爲必成雖位不酬德其設施亦略見於世矣其在兵曹也有故人以五百金越例求官先生曰予不忍自汙而忍汙故人乎求者慚而退回邑陳心齋先生以書勸講學先生辭曰某自度平生爲所不爲欲所不欲者多矣復何敢然嗚呼自聖言微而講義繁好名者咸奔走如鶩甚者恃其資力自託於坐忘頓悟滕口說而遠事情宜乎儒效日疏而謠詠者眾也若先生所謂不言而躬行者乎韓孝廉君翼次其年譜謂先生爲眞學術信夫子侍教先生久亦竊有志於學

矣而志不強立遂穫落無成先生之屬予銘也繁豈重吾言俾知
所謂學者在此不在彼耳卜於明年月日葬先生於方山祖阡而
以韓宜人祔銘曰

先生之德柔惠且直教起於家政施於國人擷其華我落其實羣
飲爾和罔不克溢惟基則壽乃甯爾室山蘊百靈水鍾百脈以利
其孫子世象厥德後有願學者視此銘石

右墓誌銘呂履恆撰

李模

李模字洪範號闕庵河南邙縣人天姿穎異家貧力學能文章順治丁酉領河南鄉貢己亥舉進士授真定府武強縣知縣武疲邑仍歲荒旱而舊例正供外按丁起差歲費民金萬餘兩模愾然太息曰民不堪命矣甫下車卽革去又府廳修公署貲皆取之屬縣民模復言於上罷之立碑著爲令康熙八年春模念民新被水災請緩徵上官不可模曰吾不能虐民以希上官也寢其令比歲終亦無逋賦十二年畿南大旱武強武邑獻縣饒陽四邑災尤甚竊民相率詣富家名曰貸粟而實劫之人心洶洶變生且不測模知常平倉有積穀四百石而文移往來非踰月不得請則民斃久矣

卽下令諭民來取穀乃申院自劾復以四邑民被災尤劇狀請救
甚力巡撫公世德大加稱賞發金四千兩分振四邑尋以聞於
朝得 旨近畿三府免民租之半而四邑盡蠲升刑部主事員外
郎提牢者四遇重囚冬必令溫飽夏必令清涼每言人卽犯大辟
未必無可矜疑者令獄未具而先死囹圄不惟情可矜疑者冤不
得伸卽應死之人不死於法而死於獄吏之凌窘尤可恨同官服
其言容城孫韻雅徵君之季子也以罣誤繫獄獄中非有資不能
居板房韻雅貧模命擇板房與之每見必詢其飢寒後事雪學者
聞而義之升禮部郎中出爲廣西提學僉事至家疾卒

右傳王登魁撰

曹玉珂

康熙十六年丁巳三月二十有六日 敕授文林郎中書科中書
曹公歿於官越七年癸亥公諸子葬公祖阡余哭公臨其穴公子
朴格集泣請余銘余拭淚而嘆曰禹疏與余爲同門友昔贈余詩
云吾與子同門同氣無以異可以知余兩人之交矣嘗謂余曰弇
州滄溟稱至交滄溟死弇州爲之銘吾長子十二年子且爲吾誌
墓矣余遜謝嗚呼孰意公果先我而逝乎追憶昔言良足悲矣然
習公而不誌則余之罪也夫因隕淚而爲之誌公諱玉珂字禹疏
號陸海一號緩齋少時性頗急太贈公戒之緩因以爲號亦韋弦
之佩遵父教也先世晉洪洞人九世祖榮禮公者徙秦富平縣爲

始祖歷四傳祖清官太醫院院判生教諭公思讓教諭公二子長
公汝葵次公汝菊兄弟皆鄉薦人稱雙璧汝葵公知蜀慶符縣爲
公曾祖生壽官公垣公大父生太贈公鉦公父也以公貴 贈文
林郎公顏堂曰四世文林蓋統貤封四世云太贈公娶王 封太
孺人實生公公魁梧偉岸風度凝整少穎書過卽成誦弱冠督學
閔公奇之入庠試輒優壬午房考吳公賞其文云與楊維斗伯仲
亟薦元以主試者不合而擯甲申逆闖陷北都悲憤棄諸生逃匿
深山中爲農氓焚帖括舉子業示不復事博稽羣書殫心於古學
搜先秦史漢八大家百家子書及漢魏三唐詩讀之頃刻數千言
其爲文究秦漢八家之精而出之以清遠其爲詩會漢魏三唐之

神而出之以幽潔然今人之詩文學古者不類矣則規規摹擬之襲古而愈戾於古公學古而不襲古而不戾於古乃儷於古而自成一家言詩與文皆傳誦於世 國朝定鼎關內憲使呂公墓公名延之西席勉入鎮安庠甲午舉於鄉與余同門余稔公名久此日始識公握手依然昆仲也已亥公 賜進士出身例授推職值裁缺改授壽張縣尹壽山左疲敝邑也自古有河患金陵口決水滄七載荒亡過半然天下有司之難難於賦役刑名而山左賦逋刑繁又多逃人盜賊累其難尤甚公撫凋敝綏流亡復業者十八九墾荒七百餘頃壽原額七千增踰萬戶口爲之充實邑有運河淺夫工食往皆派里甲公雇役不派一夫及時旱荒民艱食河工

派柳三千株百姓驚散公泣請豁免其詭隱丁糧累民歷年不清者皆釐其弊除之自是不扑而樂輸賦役不足爲公難也其於刑名也讞獄矜慎反覆務得其隱陽穀有婦孀節撫孤翁老突以痰亡其女利婦產誣以殺屢訊坐婦凌遲公與鄰邑會審公曰胡知毒也件作云投銀簪色變公命易簪投之色不變叱曰前簪假耳故色變此何等罪而草草如是耶釋冤婦件作驚服台郡頌神明以是凡鄰邑大獄不決者各臺必俟公讞其明允類如是捕逃甯盜之法則嚴保甲不爲虛文選練總以消其萌優鄉約以化其俗嘗誦歐陽公求生不得之言不妄用一刑桴鼓不驚而盜賊息矣逃人株連九家公察解數十起不株一人是逃盜二大事皆無足

爲公難者邑多前賢古蹟公皆爲之碑銘傳記修邑乘紀其山川
風物備文獻之徵一切興革利弊靡不舉其殷勤撫字惟靜以安
人不爲紛擾而已公自奉儉素飲冰茹檠無絲毫取於民撫軍劉
公芳躅巡竟郡懸牌署門云愷悌宜民廉潔第一一時稱爲知人
以故內召中祕合邑尸祝泣送者絡繹數百里如失慈母公有畱
別士民詩載之集中公少失怙事母以孝聞令壽時署中建如鏡
閣迎養太夫人太夫人老憚遠涉堅不赴任公不攜家畱魏孺人
諸子侍養獨居署七年止以少子自隨及任中祕例不可請日夜
西望而泣丁巳太夫人八袞堅意圖終養將伏闕陳情而病作
醫藥罔效易簀時無一語及家事昏瞶中猶嘖嘖呼太夫人不絕

口以至於亡所志不遂有遺憾於九京矣公嗜書壽署建琴亭政暇讀書其中在中祕日手一帙與諸名公倡和亶亶不倦平生雅善臨池摹古搨名帖如其真尤好名篆圖章收聚法物古器覈鑒以自娛所著有緩齋初集緩齋雜詩石倉詩大河志終華仙蹟志傳於世公善養生術每及參同悟真諸書嘗謂余曰吾有延年之學不可令我獨爲不死嗚呼公竟死哉公生於萬厯丁巳卒於康熙丁巳葬華原祖阡公之自罷諸生也其志願所期固老死巖穴中矣及出而登高第爲名宰讀中祕書聲華滿天下乃詠歌感慨多鬱抑沈結之懷睠念山林飄飄有出世志而親老懷歸以官卑宦貧隱忍蹉跎以至於死死之日宦橐蕭然衾棺不備良可傷也